



Ainakina 31

Kosiom. Koomoom. Kiswama.



Faith Ablaze International Ministries

Aijul kotoma Ateso

Ewadikan: Rev. Dr. Rachel Rajagopal

Ejulan: Ps. Samuel Oculi



Ateso Bible Version: Ebaibuli Loka Ateso

©2020 Faith Ablaze International Ministries

All rights reserved. No part of this book may be reproduced or modified in any form, including photocopying, recording, or by any information storage and retrieval system, without permission in writing from the author.

Apaaran nasodit (Day 1)-Pentekosit ngin paaran (Aswamisio 2:1-4)

Erai apaaran narereng, naitegelikina, oinak oni Edeke agogong naitetet, anyoun, kacaun kanukeng. Lolo, erai apaaran naitegelikina, kwape itegeara oni **Amamus Ileic Karaut Lukon!** Arasi nu aiwadikaeta 31 lu ainakina ido ijulitai kesi kotoma angajepisinei nuegelegela.

Eitunit eong neabunio Emoyo lokalaunan tomaka abu eong apup ajaut na Emoyo lokalaunan agolaka. Okaru lo 1996, abu eong a lot kide na Malesia aingarakin aibunget natumunak lu okanisa alo Iban Mesodist atutubet na enyaritai Kapit. Mam eong amisikit nu anyaritor eong Edeke alosit ngina. Abu eong enyikokite ailip komam eong apororit keda ainakit eong arimar Edeke kangin swam kere naingisi nesi eong.

Ikaru ilukumin iarei kau, obu Emoyo lokalaunan koloma neajai aibunget iyudayan lu emorikikina togo ediofet orimaritos Edeke.

Eroko Ejakait Yesu eyangara kuju, alimokinit eyuunak lu atukokina agola adiopet aiderun Emoyo lokalaunan. Arimarit kec keda aimorikikina kec obu oinak kesi adumun abongokinet namam kesi aomitos!

Kotoma oitabo lo Aswamisio ewadikat emuron Luka kosula iarei (Luke 2)

- 1 Na adolio pentekosit ajaas kesi emorikikina aibosit adiopet.
- 2 Katipet kobu airurum naitegelikina kokuju esubit bala ekwam lo akusi noi kileleb etogo loiboyoto.
- 3 Kotiakatiakaunos angejepa kwape adoyo akim akou kangin diope kakesi.
- 4 Kilelebung kanginidiope kakesi Emoyo lokalaunan inerata angajepa kwape ainakinitor Emoyo lokalaunan.

Aidarit kec mam arai titai, obu Emoyo lokalaunan kobu, kileleb etogo kere.

Aibunget na kobu otwania ekecengarenon keda aitapoet, kopotu iitutu ebe erai Edeke ekece ngarenon.

Kapaaran ana, oni luiwai eyuunak luka Ejakait Yesu, luidarit aitwekenyunio naepol arai aiteteunio. Akwap kere kwapekwana adumu adek namam engaleuni, ido oni kere imisiki ationus na agolokinio. Ilimokitai oni, ido oni da ijeni ebe mam bobo iboro epote ajaun kwape lemusek. Ekoto oni acamun ka aijulakin epone lo iswama oni, eidicane ka aijanakin luce.

Nejaar ekadakada, ejok aijulakinet.

Kopene kangopekangon, ekesisiak luka Yesu kajaasi ka ekadakada kwape kangopekangon. Ajaasi kotoma agolokinio kapaarasia akaisakany (50) akaulo ajarun ke. Ecorakit Ejakait Yesu kesi aidareun Emoyo lokalaunan. Ebusakinit kesi da aijulakin noi noi adautos apak na apol aimo akonyen nu Edeke.

Ketakanu Pentekosit neajaasi iyakia luka Yesu, aijulanakineta adis konye aijulanakineta nuajokuka kopotu otakanutu:

1. Koponi oramai kesi alimonokin eijiri.
2. Ayarit kesi etengei loka akirot.
3. Kopotu ogiasi aanyunun ilukumin itajarunos kama Kristo.
4. Obu akorakin kec iyatakin.
5. Koputu koloto kotoma awanyuneta ka aumokineta.



Inyikok aisiom eitabo loka Aswamisio isulai iarei kojenu nui pu nuikamanara akonijar.

litu akalosit na aijanakin egurupu lokatumunak okanisa lo Iban Mesodis loejai Kapit? Nu ejokak, arimar ka eporoto loka Edeke, Obu oinak eong aimorikikin keda atumunak itomonakany (15) aijanaakin engangaak elukumit (1,000) ka adepar kotoma apaarasia akanyaarei kadepar ageun kosawan iwuni lukatupuruc toni isawan iwongon luakware.

Arai nasodit eong alimonokin akirot naasabato na aitajarun ekanisa kere. Ejaas Edeke ainapetai na alimokina oni aidareun eke Emoyo lokolaunan naarai ekoto ngesi oni adumun akegogong, akemin, akeyalama, akenapakin keda akekirot na ibecokina eroko ngesi ijukara oni kinga. Awok apirianut nuka Pentekosit nasabato eraun nangin paaran!

Kobu nejai Ejakait Yesu kotoma aitoronikin.

Kobu nejai Ejakait Yesu kosodi adumun apirianut nuka Pentekosit atitai.

Kobu nejai Ejakait Yesu kojenu ebe ijo keda ekonkale mam isalete ikote nepenen bobo.

Ainingosit: Ajenun ijo kotoma apak kana! Nubonyoika ebeit ijo aswam tetere ijo ipedori adumun apirianut naka Pentekosit asabato ngin paaran?

Ailip:

Papa lo'kuju, ejaun Emoyo loka Ejakait Yesu Kristo tetere eong da aputori Ejakait Yesu Kristo tetere ejanakini luce kotoma aminakon, ainapakin keda aiyalama. Inyonyoik akaituk einer akonikirot napedor tetere epote luipu ajenun Edeke lo ajaran loepedori alacakin kes kotoma aronis ka atwanare naka ikaru kere. Kotoma okiror loka Ejakait Yesu Kristo, amen.

Apaaran nakiareit (Day 2)-Konyara Edeke Loikiara (Isaia 55:6-9)

Karaida kotoma anumam ejenasi, idope ibore ejena-eyapiei Edeke. Ijari oni kotoma apakio numam ejenas ka nuetioko da kopana. Imillionin nuka aswamisiko atwaniar; icie iwuriak mam epedoritos adumun isirigin luka esomero anu idwe kec. Mam apuganasia kere ingarakitos ikecetunga obe karaibo ngul lueponito akwap acie aswam aijar kotoma ekadakada loejai akwap kere.

Kotoma Isaia 55:6-9- ebala enabi ebe:

- 6 Komoata Ejakait kapak naepedoror adumun, kiwoneete nges kapak naeapiar.
- 7 kojai ikaronon ekerot, yenimam adolit da akeomisiko: kobongu mama ejai Ejakait, itimi nges; mama ejai Edekewok, naarai isionei noi.
- 8 Naarai ebala Ejakait ebe; akaomisiko mam eraas akusiwomisiko, karaida ikusirotin mam eraas ikarotin.
- 9 Naarai kwape iceleleo akuj adepar akwap, kwape kwangin iceleleoto ikarotin adepar ikusirotin, Akaomisiko da adepar aomisiko.

Atutubet nalolo ebala ebe eyapiei Edeke, aso, anuangun, inyarai oni nges. Mam oni ekoto acelar araibo aikidiar keda akurieu.

Eapiei Edeke. Epupi ngesi ijo keda eong. Inyikokinit Edeke anyara kere ajalakin ikec irotin lukarokok kokau kosodi abongun nejai ngesi. Ejai aisumonet ebe itimi Edeke ngul kere luibelokinos kotoma amamus adolit kosodete akerit abongor nejai adolit. Aitemisia nuka Edeke neja iketunga eraasi nu abar ebe itimi ngesi oni abarara. Ingai epedori ajenun aidules naka irotin araibo aomisiko nuka Edeke?

Icie sawan, aseketeta wok ido iwomit oni bala ijani nuipe, aticepak adepar icie itunganan. Kotoma Isaia 55:9, isitikit Edeke oni ebe ikerotin keda aomisiko eraasi nuikiara. Edeparito ajenun wok.

Eipone bon lorucokinet keda irotin ka aomisiko nuka Edeke ka aijar najokan, aijar naedolit naedekeone erai akodakin nepepe ka agangat naka Emoyo lokalaunan. Ejeni Emoyo lokalaunan aomisiko nuka Edeke, aso ipedori oni, arai imunokin oni agangat naka Emoyo lokalaunan ido mam ijalakin edicane wok nepepe ka Kristo lobu kotwana omusalaba aboiswok tetere oni erucokino nejai papa lotoma akuj.

Isialamik Edeke naarai itimi ngesi oni abarara arai ilimo oni keda aitorinikin kotoma arokisiko wok, irotin ka aomisiko numam epodosi luce.

Ainingosit: kotoma apakio nu ainingosit, inyobo idumujo nuikamanara aomisiko nuikiara nu Edeke? Eipone bani ejulakinor aijar kon kotoma okadakada alo?

Ailip:

Edeke loapedor, epuda ekon Emoyo lokalaunan aigangakin, aidar eong kotoma aomisiko ka irotin luedekeone. Kotiro eong Emoyo lokalaunan katipet neanonokaror, eguikina kotoma alosit keda Edeke. Epuda aisia noi nuikamanara keda Ejakait Yesu ka iboro luitetiak lu ekoto ngesi aisisianakin eong komoyoke. Okiror loka Ejakait wok Yesu Kristo. Amen.



Aiyalama naka Ejakait Yesu Kristo kojai kajo lolo!

Kotoma ***Amamus Ileic Karaut Lukon!*** Ainakina, ener eong akirot ketorite osineman iuni lu euriaka lu epedorio adumun kotoma **FAIM** kanu ka Kristo kotoma ane edumakinio isineman (**FAIM 4CHRIST You Tube Channel**). Kipejonokis iso angina.

Apaaran nakiwuniet (Day-3)-Apeleikineta nuka Edeke itodolikinosa kotoma Akirot naka Edeke (Isaia 55:10-11)

Aitemisia nuka Edeke itetiak nginitupuruc!

Ibwinikinitor ijo abeit naka Edeke? Ajeni eong ebe abu eong iciesawan, mam oni iyuunit aisumuneta ke nu ejaas toma obaibuli. Arai itema oni kere ebe abeit iyuunit abeitok nuka Edeke, apolouke akuan naka Kristo ebuni ajaikin aboisit naka jokan. Mam do ekanisa ebuni do eicod kotoma akwap kana, konye akerit keda Edeke keda agogong akati kangin na einakini luce aanyun atemelel naka aiwony naka Edeke.

Iwadikat enabi Isaia kotoma osula 55,

10 Naarai kwape etepia akiru ka akako abunore kakuj, komam ebognori ngina, konye icocoi alup, isibwanguni isiburukunyi,

11 Ejaun kwapekwangin akakirot naelomuni kaitukuka, mam ebonguni mama ajai epalapat, konye itodoli nuitojokit eong, ido ekerianar kanueyakiara.

Karaida akiru ka akako ejaas kalosikinet, icociete alup ka icokoda abwangun (alomun) ka aturoda aterun. Ne inuminumia oni atemelel naka alup nepepe iragin ke kere apak na etepia akiru, isitikini oni ebe araida akiru ka akako ejaas alosikineta kec.

Elomuni akirot kotoma aiyengakinet naka Edeke aitodolikin alosikinet anu arucokin etunganan ka Edeke. Akiro nuka Edeke, mam ebongorete epalipalitos. Akot naka Akirot Edeke, kotoma agangat naka Ekemoyo lokalaunan, isinepuni itaon wok ka abeite ke namam edaun. Akirot Edeke itodolokini alosikinet ke elacakini oni!

Yesu loka Nasaret, Akirot obe naka Edeke, alosikinit aitelel Edeke. Ne icamunia oni Ejakait Yesu aibikakin aiyuun wok tomake bon, irikakini ngesi alosikinet na alacakin oni kotoma okatwak.

Akerianar naka Edeke kotoma aijar kon, ejai kotoma Akirot naka Edeke kotoma aijar kon. Iyengar nges, orima nges, ojar nges, komor nges.

Ainingosit: Icamakini jo Akirot naka Edeke kolacak ijo kotoma awenisiakon nuka aronis?

Ailip:

Edeke, epuda eong araut lo alacakina cut kotoma awenio naka aronis ka akurieu. Epuda akonikirot naejari aileleb aka acoa ka etau. Kitopolorai Edeke kotoma aijaraka lolo. Kotoma okiror loka Ejakaitwok Yesu Kristo. Amen.



Apaaran nakiwongonet (Day-4) - Aiyapeperanut itodoli Alaunit (Isaia 57:15)

Ebala Isaia 57:15

“Naaarai ebala kwanata ngol loicelelei loimukurur loiboikin nemam edaun, ekekiror lokalaunan ebe: Eboie eong kaibois naicelelei nakalaunan, nepepe kangin yenejai emoyo loka luitasonos, ido aisikwarun emoyo loka luitoronikina.”

Isiomi oni apapulai nu iyemuto, iwanyuni oni aomisio nu egelegela nu inyakete ka amunar aijar na itegelikina na einakit Edeke oni. Itolomio idwe kinga, ebuio angor ka aiyar, emudianaro icaloi kotoma aswamisio nu arokok nuka ikabenyak ka acieda. Iciesawan naiwanyunia oni eigur ka nueroko isomaunos, aumokini eong aikalal. Ipogakin do oni kere noi adepar Edeke lokalaunan ido amamus apodokin awate wok? Iridak oni ainakinet naka aijar kasodete acakar awai ne etukonokino agasia?

Isiitikit oni enabi Isaia ebe Edeke lokalaunan iboiei anejaas ngul luitasonos ka luebilil.

Epone loka Edeke mam erai alaunit bon, konye akirot nakalolo ebala ebe Ekiror erai lokalaunan. Edeke kotoma agogong nakalaunit ke edolokini ngul lu itasonikinos ka luitoronikina kakonyen ke.

Iboiei Edeke kaiboisit naicelelei kanalaunan nges abois na aimal, aima ka aitur. Ngin nges aibois na ailip, atukonokin ka aijanakin. Konye newanyuna ngesi etau lo itasono ka lo itoronikin, edolokini Edeke aisiteteun oni. Iyengakino eiyengane lokaijar nejaas itaon luekapakina atiroro nakaijulakin.

Ainingosit: Epone bani ibongokina oni kotoma aiyapepera nejai Edeke lokalaunan? Ido bodo jo ikapakina jo aijaun atiroro naka Edeke nakalaunan aisiteteuno kotoma aijar kon? Aso, eipone ediopet bon nges aitasonikin ka aitoronikin kotoma adiakanaleta kon. Ipedori ijo atemar ebe ajok eong kama ejai Edeke mam eong adiakarit. Ipapero, 1Yokana 1:8 elimokinit oni ebe, “Arai kinere ebe emamei oni adiakar, kimoda bonik.”

Ailip:

Edeke lokalaunan, igangak eong atiror luce kotoma aitasonikin nabeit na isialamikit ijo bon. Igangak eong araut loesunyakit asialamikin aijar ngin na ijaikinit ijo eong ka ainyonyoikin eong araut loayangari alaunit naka Edeke toma akwap na ibiroro. Kotoma okiror loka Ejakait Yesu Kristo. Amen.

Apaaran nakikanyet (Day-5) - Agogong kotoma areo (Matayo 5:10)

Matayo 5:10

Isirerengitoi luimanitai kanuka adolit, naarai ajakanut naka akuj erai nakec.

Corie Ten Boom, aberu na Dutch na obu igangak lyudayan aisi kotoma ojie loka iareit lo akwap kere, koponi ngesi da ikamunai ka aimanio (areunit) ko German Nazis. Erai nges aberu na obu oku amudiaro. Agogong akeyuun kotoma Edeke kosodi aitetemun aiyuun kopone kalota:

Esubit aiyuun bala icuma yen engicuni ibore yen elwana ka ejauteneke kotoma elisina.

Abeit naka iboro lu eluaka lumam akongu itunganan epedori aanyun.

Ijeni oni ebe areo (aimanio) erai nu abeit kapakio wok. Adiope apugan kotoma Asia na adedeng nejai Kristo areun iketunga aisimik idwe aisia kotoma osemerei lu epukoritos Ikristayon. Koponi ijesunai imusalaban kadukena nu ecelelele nuka ikanisan luipu. Ikristayon kotoma akwapin nuka Afrika itaanyutai ican, ekamanar ido aari.

Angor nu Kristayon ebuinikitai alimor aiyuun kotoma Kristo kotoma aiyuunet namam itodiarit amin naka Edeke.

Ijenuni oni kabeit ebe ngul kere lu ereitai kanuka Kristo irumete ajakanut naka akuj.

Ajaut naka esasedotene loka Edeke eraun aiyalama na ejok aite. Ne ilipia oni anuangun ereitai, elipata ebe aiyuun kec iyatakin ka itaon kec da inyikokisi ailelebur aimal ka aiyalama naarai ejai Edeke toma aitanetakec. Arai ireitai ijo kotoma akuan, aomisio, komoyo, karaibo ajaut kaluce kanu abuakon kotoma Kristo, kojenu ebe mam erai ijo bon. Kinyikok aimalaenen Edeke naarai eyapiei kosiep kon. Itei Kristo ailipkon ido emonyi kajo. Kogogongor ka ainyikokit abua kanuka Kristo kotoma apedor ke.

Ainingosit: Anibo akiro acie nu aijulakin areo kotoma aijar kon arai bo aijar naka akwapkon keda aisumuneta nuka Edeke kotoma aijar kon arai aijar naka akwap kon?

Ailip:

Koinak Edeke ayuar, ainapakin ka aiyalama nejai idiotunganan yeni ereitai kanuka Kristo. Kisisianak Edeke eong ailip kopone angul ereitai kotoma/anatar akwap kere, kitopolorai ekekiror loka Ejakait Yesu Kristo.

Apaaran nakikanyetekape (Day-6) - Ikecokok kwape ejaar etau loka Edeke (Yeremia 3:15)

Alot eong akwapin nuipu. Aciepakio nasabaato, mam eong araun akalimonokinan nakapaaran. Icie sawan, etidisanar eong ne elimonokinere eijiri nasabaato nemam elimunere Ejakait Yesu Kristo ka akeswam na alakunio. Icie sawan mam elimuno Emoyo Lokalalaunan cut karaida kotoma ailip na egolokini!

Ejai ne aisumunet naitegelikina kama ejai Edeke nejaas idwe luemamei aiyuun kotoma. Yeremia 3:15.

Kinakini yes ikecokok kwape ejaar ekatau, lukitanyamenenete yes kacoa ka ajenun. Isitikit Edeke ebe arai esipokinit nges oni kwape engarenok, arai akal, ekanisa, iriongeta arai akwapin, anyarau ngesi oni acok itunga lu amunokinor ngesi oni; ejai oni da epelu lo ainakin aisisia, ajenun ka aitetemonor akirot naka Edeke.

Etau loka Edeke erai anuka akwapin ido ngesi ainakina okokuke loteluna, Yesu Kristo kwape ekapuron atwanare omusalaba. Etau lo Edeke ka akoteke aswam na alakunio ideleleut aminake na idul kanu akwap. Itimi Edeke ka ejaatar ainapeta nu epolok anu aitekerian oni.

Imisikini oni ebe ne emamear oni aiyuun kwape idwe luka Isirael, esalakini Edeke erai lomunot, amunonut noi araut ekatimon.

Ainingosit: Anibo aijulijuleta nuka aijar nu ipedori ijo arai irai jo ekilokit araibo aberu kwape ejaar etau loka Edeke?

Ailip:

Itim eong, okwe Edeke nemam eong atupitor ekoniroto loka amin. Epuda eong etau loka ekecokon lo aijanakin. Epuda eong akonicoa kwape eboikinor akejenkon aijaun aijen ka ajenun. Ngin paaran, epuda eong aijanakin kainapaara ka abeit aingarenikin ikonitunga aputoor kotoma asima naka Kristo. Eyalama kanuka angarenikinio ka aitetenaario anu aswam ngul kere nu ejokuka. Itubusikinai Edeke kotoma aijar ka kokiror loka Ejakaitwok Yesu Kristo. Amen.

Apaaran nakikanyetekaarei (Day-7)-Kolakanar kama ejai Ejakait Yesu (Isabulin 37:3-4)

Isabulin 37:3-4

3 komunonena EJAKAIT, Kiswamaenenei nuejok; Kiboienei kakwap, kotupenei amunonut

4 kolakanar kama ejai Ejakait; kiinakini ngesi da jo nuimiela ekonitau.

Eitut eong eipone lo epudar eong aitac isirigin ka lu asioman kwape awutar eong angetakin epurogram loka adokita (doctoral program). Kwape isirigin ka luetosomas noi owai lo aporonor aswam naka Edeke, amameete eong isirigin luepu atacakin ekaruka lo awasia.

Kotoma otauka, etemokit eong mam atiror isirigin lu ajaasi anu asioman. Aswam naka Edeke ainyikokit kwape enapitor Edeke kanuka. Apol noi alosit, aitub angololin anu aisianakin ecokok ka engarenok luka ekanisa.

Alosi eong nepepe ka apaperoka najokan noi airirit ecilet, ongesari aitwobwoun eong ka alimokin eong ebe itepesenit ngesi Edeke aigang asioman ka.

Akaulo na apaarasia aarei, abu eong adum eyemut kama anejaasi ekesisiak ka kotoma akwap acie. Kesi da bobo kitepesenit Emoyo loka Edeke alemun isirigin kanukasioman ka.

Abu eong adum aiyalamikin ebe Edeke ainakin isirigin luepu kotoma apaarasia numam adolito akanykaarei. Aiyatakin nen, eyuunit eong ebe Edeke arimar eong naarai abu eong aseu alakanar, adumun aiyalama kotoma amunokina lo erai ingai ngesi. Erai Edeke lo ejok ka lomunot. Eyalama eong araut nake. Do bodo jo?

Isabulin 37:3 Icorakinit oni **amunokina** Ejakait ka aijulakin aiyuun wok araun aswamisio, aswam ejok. Oni kere kija kalosikinet nasalakin irai lumunon nejai Edeke kotoma anginibois na esipokinit ngesi oni. Imunokini oni Edeke aijulakin oni kotoma asima naka asipoki ngesi oni ka aisianakin oni keda Ekemoyo Lokalaunan aswam ejok.

Ainingosit: Anibo ice ipudesia lu etau lu ikotojo lolo aibikakin akonyen ke Edeke?

Ailip:

Eyalama, Edeke anu ajaus kon kotoma arerengesioka. Koinakinai eong aiyuun na edolit aiyuun ebe iinakini ijo eong ipudesia luka etauka luejaas kotoma aitekoro naka akote kon. Kokiror loka Ejakait Yesu Kristo. Amen.



Apaaran nakikanyetekauni (Day-8)-Kopalasi kojenu Edeke (Isabulin 46:10)

Ainakina na euriana na alolo ebuni aitogogong ngul lu eraasi ekelipak. Ejai eong ekokoro lo epatana konye ejaas keda apedor noi lo idumakini oni toma Isabulin 46:10

Kopalasi, kojenu ebe eong Edeke: ketopoloonorio katekerin, ketopoloonorio kakwap!

Arai eong akalipan ageun 1994 ne esisianakina eong engarenon lo ekanisa. Ageun kangin, arai nu eswamas nginipaaran akwenyunun tupuruc sek airiamun keda Ejakait Yesu Kristo. Kotoma kosawan lukainapakin ebai kide, ipedori oni apalar ka ajenun ebe erai ngesi Edeke.

Erai apak naitegelikina na ajaut akonyeneke ka aisilebio keda ake ainapakin, amin ka aiyalama. Irucokin oni keda Edeke kotoma apak naililingikin naidul ido ipedori oni apupun eyengane wok! Ka ipupunio oni ekeporoto, esomun do emoyo wok kuju keda aiyalama ka aitopoloor nges! Itopoloori oni nges naarai eapiei, ajaus ke ecauni kotoma wok.

Abongokineta wok eminasi ogelegela, ipedori oni aimony, ainyik (aiwute), akena arai aimuriemurie elilinga imisiik oni ajaus ke. Eraas nu apakio nuitegelikina keda Yesu ebe ikoto ijo aikamar. Eraasi nu apakio nu ejokuka keda Edeke lo emin oni.

Adiope paaran, ne aoomoma eong nepepe keda Edeke, erai lo eipone lo engarenikina ngesi eong aiwadik bobo:

Aoomoomenen asianut naka Edeke-acamunio namam abeit naeinaki Edeke.

Abeit atwanare na ikarukere konye kocamunai keda aijar naka ikar kere,
nejai toma Yesu, Okoku Loka Edeke,
iseu ijo amunokin.

Italaunitai ka icamutai kwana,
Koraun Emoyo lokalaunan ekoningarenon.

Ecamunitai cut kotoma adoketait naka asianut,
konye ibore yen iyiritai erai yen edit anu eponitos koingaren.

Koinak kwana akonikuwan,
Koraun Emoyo lokalaunan ekoningarenon.

Ainingosit: Erai ibore yen etiono araut apalar, aililing akonyen nuka Edeke? Ani aijulijuleta nu ipedori ijo aiswamaun kotoma ainapeta nuka aijarkon tetere ipedori ijo ainumunum ajokisio numam edaunos keda Edeke?

Ailip:

Itim eong, okwe Edeke nemam eong eswamator apak na ajaut keda jo. Inyonyoik akiika apupun akonikirot ka abukokin eipud loitet lo ainganga kotoma otauka. Kotoma okiror loka Ejakait Yesu Kristo. Amen.



Apaaran nakikanyetekaongon (Day-9)-Mam akurian (2 Timoteo 1:7)

2 Timoteo 1:7

Naarai mam Edeke abu oinak oni emoyo loka akurian, dimarai loka apedor ka loka amin, ka loka aiyapaara da.

Ipedori oni ajaut 2 Timoteo 1:7 anu aisinyikokina luce ka onida anu aitetemonoro aiyuun wok kotoma Kristo, irwana pu kotoma olapio idis lu okau ka ikar lu oingaren.

Adiope atutubet naka Akiro Nukajokak nges araut ekeyuunan loka abeit ka ekatupiton loka Ejakait Yesu Kristo nges ebe mam oni ipuda akurianar idio bore arai idio tunganan ilema Edeke wok. Ejai amun na egogong na edumakinio nejai Kristo. Ekoto oni acamun abeit nakaiyuun kotoma Kristo. Mam eong atupakini ediorot ilema erot loka Kristo. Ijauni oni ka aitetemonor apedor, amin na itekoro ka aiyapaara kotoma agogong naka Emoyo loka Edeke Lokalaunan.

Mam itami idio bore kere kagogong wok kwape mam iriamarotor kagogong naeinakinit Edeke. Erai na aseket na iswamauni oni nginipaaran. Ipedori oni aswam kotoma amin na inaikinit oni ka amin na ticepak emamete alosikineta nu elaete arai bo ipedori oni aswam kotoma amin naka Edeke na elai kotoma alibunet ke.

Amin naka Edeke epedori aingarakin oni aitetemonor aiyapaara keda agangat naka Emoyo Lokalaunan. Apedori eong aseket mam einer akiro nu itipilete arai aseket mam aiswamaikin ijo nu eroko.

Aiyapaara erai ainakinet napedor naarai arai emamei aijar wok kere emameun ainapakina. Aiyuun wok kotoma Kristo esipokini oni amamus keda akurian kotoma kanu Edeke. Akurian wok ekot orai nejai Edeke bon-ido erai do ngin aimorikikina naka aima ka ayongit. Mam oni ikurianar idio bore kere yenimam erai kama ejai Edeke.

Ainingosit: Anibo akurieu na inyaki jo kau anu jo aikeitoi ka Edeke kotoma aijar ka arai bo aijanakin?

Ailip:

Ebikakini akurieu ka kere (olimuni kesi) kotoma omusalaba loka Yesu Kristo. Epuda eong bon ajaut akurian naka Edeke kotomaka. Kobukok Emoyokon lokapedor ka amin ka aitikokina naka Ejakaitwok Yesu Kristo ne ajai eong, ekaleka, ipaperoka ka akwap ka. Okwe Edeke.

Kotoma okiror loka Ejakaitwok Yesu Kristo. Amen!



Apaaran nakitomonet (Day-10)-Erai Edeke Kanuwok (Iromayon 8:31-32)

Eraas nu apaarasia nuamamus amera kwape inyikokitor oni asesen akwap ikilianar kotoma apipul kotoma oponesio lu egelegela.

Kotoma Iromayon 8:31-32, iningit eyakia Paul oni:

- 31 Aso do kinera anu kangun? Arai ejai Edeke kanuwok ingai tope kisurokini oni?
- 32 Ngol lomam abu kimik okokuke elopet, konye koinak nges kanuwok kere, mam kereka kikorakini ibore kere da nepepe kanges?

Adumunit eong ikokoron lu itogogongoete noi ido einakinete oni araun nu isirerengitai kwape ikatupitok luka Kristo. Ekot oni amisikin ebe imai oni Edeke lo ejai kuju idekesio kere. Emamei bobo ecie lo eputos kanges.

Erai abeit. Arai mam Edeke kobu kimik okokuke loteluna, Yesu Kristo lo Nasareti, abeit epedori ngesi abukokin ake asianut mamawok ka ainakin oni ibore kere kotoma akoteke. Araina aiyir naedit naka iboro kere nuingadit Edeke kanuwok. Eebo, aiyuun nabeit na ekristayot ejeni ka iyuunit ebe ejok Edeke ido epikoran.

Erai Edeke apedoriwok, agogongwok ka amunwok. Ejaenena Edeke kanuwok ageun apak na asubio. Ejaenena Edeke kanuwok toma aibiror naka etunganan. Inyikokit Edeke ajaut kanuwok kotoma aturio naarai erai nges amin.

Ipapero, ne ijaar oni nepepe ka Edeke, ija oni kosiep lo aitelekar. Abeit, irai oni ekepikekorak toma ka anu Edeke. Konye ekepikekorak ipudasi aitup icie ikisila ka ainapeta nu aitutoorio tetere kes etapit angetakin erai epikorak.

Ainingosit: Inyo iboro icie lumam etiroro ka lu etiroro lu ipedori ijo angit Edeke? Kitemokina ijo aijaun ainakineta ngul bon kotoma akoteke ka ajalakin idio bore yen mam ijo ipuda?

Ailip:

Ingarak eong amisikin etia aminakon kamaaka, okwe Edeke. Eyalama ainakin eong adio ainakinet najokan kotoma akuj. Ingarak eong ke Emoyo Lokalaunan alosit kotoma abeit ka adolit, aitwasam adio ainakinet ka arerengesio nu einakitai eong kaiyuun kanuka aibuses kon. Koinakinai eong agogong na apedoria aitor aitutoorio na epikorak anu Kristo kotoma okiror loka Ejakaitwok Yesu Kristo. Amen.



Apaaran nakitomonetkadop (Day-11)-Irumit Ejakait (1 Aisitonokin 16:31)

Ilojo kokinga? Iwanyut ijo atemelel naka iragin luka akwap? Amuno eong ebe akonye wok anyamata atemelel naka iragin luka aturo ka ainumunum apejo naka ikweny luka iragin. Amuno eong ebe iyangaik oni apak aiyenganar ekwam lo ejok ka acamakin akonyewok aimuriamuria kotoma atemelel.

1 Aisitonokin 16:31 inyikokit aikeun imoyonwok ne isiomia nges:

Kiyalamikin akuj, kolel akwap, kolimosi katekerin ebe, irumit Ejakait!

Oomoom, ebe mam acie karaida etiokoto apakio, ne isesenia ijo akuj ka aanyun akuj nabululu, atemelel na ecai na aswamisio nuka Edeke ibikakini aimuriamuria oretawok. Ne isesenia ijo airimokin ijo ka awanyun ikito lupiria ka ikutuo lukomusugun (Europe), amoding nako kiding Kide, akipi nubululu nuka angolol naka Karibian, adukena nuaojak nu edolitos atiror akolong kotoma obugai Asia araibo itogoi ludidik luedukitai ka alupot ka akwi kotoma akwap na Afrika, ekot itunganan aibwo kaiyalama koingaren naka Edeke alo ipugai.

Akwapin kere elosete acamun ebe Yesu nges Ejakait ne edolio apak. Teni, ekot aitunun ebe ekomanda loapolon, ekabaka loka ikabakan loka akwapin kere erai Edeke ediopet lo asubi akwap kere!

Karaida ewutara akwap kere kotoma apipul na ikadakadan luegelegela, kwape ikatupitok luka Ejakait Yesu, ayangaikis apak na ainguun aturo ka apupun ikweny ewoete.

Ainingosit: Akaulo ainakina ana euriana, oyangaik alosit kinga naka etogokon arai mam etepi loepol. Ikeu akaninkon kaju ka aimal Edeke. Iyenga ekwam loitet/loejok. Arai etepi ane ijaijo, inumunum atemelel naka edou ka aitun ebe erai ngol eipone lo etepia Emoyo loka Edeke kwap ne ijai oni ne ilumoro oni awatewok toma asianut naka Edeke.

Ailip:

Mam oni itwaniari aikweny naka Edeke alo ipugai! Ilelebai itaon wok keda aiyalama ka aimuriamurie koretawok kwape isesenia iriamun oni ka aanyun atemelel naka isuban luka Edeke. Kotoma okiror loka Ejakait Yesu Kristo, kitemari oni ka awoere Aleluya!



Apaaran naitomonetaarei (Day-12)-Araut itunga luka Edeke (Yeremia 30:22)

Ekokoro loalolo kapatan ideleleunit etiai lo eminar oni Edeke. Ekokoro lo ewadikaikitai Isirael; Isitikit kes Edeke aitutuketke aisirereng kesi konye iswamas nu kotoma Mesia.

Aomoomoi eong nu ikamanara oni nui pu nuicamunit Kristo, aimoriar eong da, eitunit abeit eipone loilosio awai anejai Edeke. Icie sawan, karaida akaulo acamun Kristo ka aibatisao, inyikokit oni aiyalongong, amamus aiyuun ka amamus arima abeit naka aiwadikaeta. Erono na naarai mam Edeke ekoto oni alwanus kama keng.

Konye kwape Edeke isitikitor Isirael, isitikit oni da lolo kotoma Yeremia 30:22:

iraunos ikatunga. Eong da araun Ekusideke.

Ijeni jo ebe imai oni Edeke lo erai bon, bon noi? Ebalan nges ikatunga, ido ibuni oni araun itunga luka Edeke kotoma aibikakin amuno na nginidiope nejai Yesu.

Kopupok, emamei idiotunganan yen ecamuni Yesu kwape okoku loka Edeke, Ejakait ka etajaran kokirorkon. Asekunet erai nakon bon. Abeit naka Emoyo Lokalaunan ebe irai oni odwe luka Edeke ebuni ne ibikakina oni amunowok toma Ejakait Yesu Kristo. Ijeni oni ebe Edeke nges papawok.

Aso, itunga kere luka Edeke ipudas adakakin nejai Edeke bon loapedor. Arai mam jo idakakit nejai Ejakait Yesu Kristo, Yesu loabu kotwana komusalaba ido kitajarunai akaulo na anukere apaarasia auni, kwana epol apak na.

Aningosit: inyoni apolou ebe “itunga” luka Edeke ane ijai jo?

Ailip (Arai akonipak nasodit aijaun Kristo):

Papa lokokuju, Eyalama anu Okokukon Yesu lo obu kotwana omusalaba kanuka ka abukor ake aokot tetere akadiakanareta kere ilotaro awai. Itimoi anu eswamat kere nu eroko ka aiyuun kotoma Kristo, ejauni aitimesia kon. Alimori ebe Yesu nges Ejakait ka etajaran loka akaijar. Ingarak eong aijar aijar naka Kristo kotoma apedor naka Emoyo Lokalaunan. Eyalama aitarau eong ikonikoku ka ainakin eong Arereng na aisia nui pu nuikamunitos ijo ka aijanakin ijo. Anu akonibuses ka otoma okiror loka Ejakait ka Yesu Kristo. Amen.

Apaaran nakitomonetkauni (Day-13)-Konyara Edeke Ekasuban (Yeremia 33:2-3)

Itunga luipu emaete iboro luesubitai-ilope, isirigin, aswam, nuitolomunito, luejenara, aboliak ka aputosia da. Ngun kere nu alimo eong ayanga aboisit naka Edeke ido aputosia. Aputosia ayangasi aiboisit naka aima wok itia Edeke, Ekasuban nges ejai kuju na aima wok.

Anuinyo ekotor idio itunganan aima iboro lu esubitai konye ongara ekek kanuwok aima Edeke Ekasuban? Iboro lu esubitai eraas lu edisiak ido mam oni ipuda aicanican apak aikeun kes aiboisit naka Edeke.

Nu itakadikinitos eong nges aijen ebe ejaas itunga lu apolok lu ipu lukesubi Edeke lu ainakinos kotoma aitolom akoikes. Itunga luapolok lu einakitai aijar kabeit eyarete aijar kotoma akoik ido icie sawan kinga na akoik. Erai na esil ido etunganan iswamat. Imillionin lu itunga ipudas aitoronikin anu adiakar na etiono. Alibunet na aitolom akoikes araun aputo kotoma aijar na imillionin lu itunga lu igangitos. Eipone ani epatanar ainakin kotoma aima aputo?

Edeke Ekasuban lo obu kopesik akwap, isuban kere ka aicer nu edakitos aiyeyea nu abongonokineta nu angiseta wok. Kotoma abeit Yeremia 33:3 isinyikokit oni anyara Edeke lo erai Ekasuban tetere nges ebongokini jo ka eong.

Yeremia 33:2-3 ebala ebe:

- 2 Inere kwanata Ejakait loiswamai, Ejakait lokesubi aiticat, Ejakait nges ekekiror, ebe
- 3 Konyarai, eong da kabongokini, kapukok nuka apolok, ka nuetioko, numam ijeni.

Erai na Arereng ajenun ebe ejai Edeke apedor abongokin adio aingiset na aticepak ejai keda oni araibo ailip na einakino kotoma akoteke. Ejaas nges ka apedor na aitim oni ka asipokin oni kotoma akabakanut ke kakwap. Ejaas nges ka apedor na aijulakin acoa wok, itaon, ka imoyoi tetere nepetai iputori Ejakait Yesu Kristo. Irai oni ikedwe.

Ainingosit: anibo aingiseta nu ejaas kajo anuka Edeke? Konyara nges, ido ebongokini nges da ijo.

Ailip:

(Iwadik akonilipa anu aimal Edeke).



Apaaran nakitomonetkaongon (Day-14)-Edeke lo emunoono (Akuudian 3:22-23)

Mam oni ekoto ileic airum ne mam ngul luejenete amin naka Edeke ka apedor ekwenatar, atubonokin araibo aire oni.

Ikar lu ipu kokau, eitu eong alimonokin eijiri kokanisa lo Indonesia. Aja itunga nepetai 400. Etapit ainakin anyarauno aitajario engetakin eijiri. Konye kapaarit kangin, akoto eong Edeke ainakin anyarauno akidingot naka eijiri. Ne arimara eong Edeke, kabeit obu ekanisa kere okwenar eong. Kopotu ileic kirumata eong konye kobu Edeke isiitik eong katipet ebe ekwenatar nges. Keja ngun da, etunganan ediopet kobu konyou kosodi aijaun Kristo kwape ibore yenisodit! Ituritete Edeke.

Ikokoron lu lolo edumunitai kotoma Akuudian 3:22-23:

22 Mam enangi aitim naka Ejakait naarai mam ingongari aisionike.

23 Itet anginitupuruc epol akonimunonut.

Ikwenyuni oni angina tupuruc nejai amin naka Edeke ka aitimesia nuitetiak. Ipedori oni aswam nu kamuno naarai kanuka amunonut naka Edeke mama wok, mere aiyuunwok mamake. Kowanyu, mere nuikamunitos oni konye nuikamunitos ingai Edeke.

Abu eong ajenik etiai lo aminar Edeke ekanisa lo Indonesia ido abu eong enyikok alimonokin eijiri. Akoto Edeke aitodiar aketimesia najakesi bobo. Obu bobo Edeke kibikak kotauka ebe epuda eong abwoun kasodi anyaraun ekanisa acamun eworo loka aitajario.

Apak kana, abu eong alimok ekanisa ebe abwounit eong anu arimar Edeke. Kobu bobo ekanisa okwenia anu eong aisukunyikin/anyaraikin aitajario. Abu eong alimok kes ajalakin akwena ka aisukunyun kes aoomoom nuepolok nuikamanara ka Edeke. Nuejooka, nepetai itunga 390 lu Indonesia koseutu aibwo ka acamun aitajario kec kotoma Kristo.

Kabeit, ipuda Edeke aitodikin oni aketimesia anginipaaran anu naarai akemin epol. Ebalakirot ebe anu naarai epol amin naka Edeke, mam oni inyamario. Eebo, mam oni inyamario arai etapit oni abongonor mama keng (nejai ngesi).

Ainingosit: Koyangaik apak aimal Edeke anu ikeponesio. Erai ngesi loepol, lomunon ka loitimono.

Ailip:

Isirereng eong kangin paaran keda akonimin naepol ka amunonut. Okwe Edeke ido igangak eong aitodikin luce da kwangin. Kotoma okiror loka Ejakaitwok Yesu Kristo. Amen.



Apaaran nakitomonetakany (Day-15)-Yawe Ainapakin ko Yerusalem (Isabulin 122:6-9)

Ailipa adio naetapit kotimuka lo aijanakin (Faith Ablaze International Ministries) nges ebe idakanakini akwap na kiding kide kotoma ailipasia kosi. Kotoma aitebeikin, ilipi kanuka ainapakin naka Yerusalem.

Isabulin 122:6-9 inera ebe:

- 6 Kilipakis Yerusalem ainapakin, ekeriakaros lukiminas jo.
- 7 Kojau ainapakin kotoma arwatatinikon, akerianut da otogoikon lukapolok.
- 8 Kanuka ikainacan ka ikapaup, alimuni do ebe, kojaun ainapakin tomakon.
- 9 Kanuka etogo loka Ejakait Ewokodeke kamoikini jo ajokis.

Iyuunit oni akirot naka Edeke ka acie apakio itwanianari oni akirot ke anu naarai atakit wok arai bo aisidolikin aijamam/ipudesia wok. Karaida iwadikat ekewadikan esabuli lo ikar lu ipu kau, aicorakinet naka ailip anu ainapakin naka Yerusalem inyikokit toni lolo da.

Arai iswamat oni aingic adio, ti oni iwanyu amamus ainapakina kotoma Kiding Kide ido noi noi toma Yerusalem. Ainapakin nako Yerusalem ekodakina nepepe kayuara kaimorikikina kotoma okiror loka Yesu Kristo loka Nasaret. Apolou naka akirot ainapakin (*shalom*) k'Buranian aileleba, ajokis, angaleu, ayuara ka akerianut, ayait nepepe kanges ejautene lomam aijulakin.

Erai epelu naka aswamisioit na ejok na ngin eyuunan kotoma Kristo araut yen ilipanakini luce itunga tetere kesi ejenunete Yehova ainapakin, Edeke loka ainapakin.

Ainingosit: Inyobo itikokini jo arimar aicorakinet naka ailip anu ainapakin nako Yerusalem?

Ailip:

Yehova ainapakin, Eyalama ebe ainapakin kon ejai Yerusalem. Engarenok kere kotoma akwap na kiding kide inumunumete aitim kon kotoma okiror loka Ejakait Yesu Kristo. Amen.

Apaaran nakitomonetkanykape (Day-16)-Aijanakin Kristo (Ikolosain 3:23-24)

Aomoomoi eong anu icie kayesi lu isirerengitoi aswam ka icie kayesi lu aticepak iutasi adumun ipeleik lu ejokuka. Icie kayesi iswamaete aticepak kwap naka asioman kon arai aitutoorio kon. Erai na naiyapepera noi. Icie kayesi iraa lu itolomete itunga aswamisiko arai ijaas keda aicuris nakapedor kus. Nuatoto, eke-darak keda ekesisiak eraas eswamak.

Iningitere ijo apakio acie aswam iboro lueroko arai lu imusungete kotoma aswam? Konye obu jo kiswama naarai epuda loapolonkon ijo aitup ngun? Eebo, iboro kangun mam einakinet aibuses nejai Edeke cut.

Eitut eong adiopepak ne eswama eong akwap acie, ediope eswamak kosi kotoma aomisiko, kingit eong atiakun isirigin luepu lu atacitai epurojekt lo erionget lu adolitos nepetai ¼ imillionin lu isirigin lu America (idolas). Kosubunitene, abu eong agir ka erionget aiyap aitac iso.

Arai eong ekeyuunan kotoma Kristo, ido noi noi arai irai oni eyuunak kotoma Kristo, apolouke ekot oni aingad Ikolosain 3:23-24 koyapiei kotaon wok:

23 Yen iswamaete kere, kiswamaenenete kaijar kere, bala iswamanakinete Ejakait kwabo mere itunga.

24 Kojenete ebe kiinakini Ejakait eropit loka airumet, ijaanakinete Ejakait Kristo.

Ejok, atacio naka epurojekt obu kiyap noi, aporori eong oyapiesi ke eswaman ka aanyun ebe etacitai iso. Abu elip noi ka aingit Edeke angaar ekek loka epuresident alo erionget loepol lokinga.

Obu Edeke kobongok ailipasiaka. Abu eong eboikin oyapiesi kepuresident loerionget ka alimokin nges ebe mam eong anyouni akwapke toni erionget atacakin isirigin luedeuna, apak ngin kere keda aimuriemurie na inapara koreet ka.

Abu eong apup kotoma ka aswam ejok noi kanuka Edeke ka epuda eong nu etorit eong kere araun ajenanut anu ainakin aibuses nejai Edeke. Anu aiturian aitetemet na (awaragat), abu alomakinga koyapiesi kec kede apapula na ecamakini aingadis na apiyai atacakin itunganan isirigin kotoma akanika akaulo na aidar nepetai atutubet nakapaaran. Arai ngin atutubet nakapaaran adaun alimoria ebe ebuni Edeke toma tetere luce eanyunete akeibuses kotoma ajar ka. Adolit cut aidareun.

Ainingosit: Eipone bani ijulakina jo aiboisit na iswama jo keda aijanakin naka edekeone?

Ailip:

Isisianak eong ainumunum acoakon anu asubun aseuneta, ainapakin naka Kristo anu etau alo ililingi ka Emoyo Lokalaunan lo etiaki ka aanyun nedeparit akwap naiboisit naka aswam ka. Ingarak eong ka Emoyokon Lokalaunan anu araun ekajulakinan lo ajokan anuka aibuseskon. Kotoma okiror loka Yesu. Amen.



Apaaran nakitomonetkanykaarei (Day-17)-Ejakait nges ekecokonika (Isabulin 23:1)

Kotoma apaarasia adis, ilosi oni aisialamikin esabuli lo ejena, lo emina noi, Isabulin 23 nges esabuli losodit lo abu eong kesisiau kotoma kosomero kwape apese nadit. Erai esabuli lo euriana lo isulai ikanykape konye erai lo apedor ka lo ejai apolou.

Kobu ekewadikan itacau kabeit kotoma osula 1.

Ejakait nges ekecokonika, emamei ibore yenepuda.

Obu oyangaik eong apak na epol anu amisikin aidules na esula alo. Kotoma osomero, ilimunenei iso nges kotoma akwes. Abu eong amisik esula lo ejok akaulo eong ainyeikin ekapelu ka agear asioman naka ebaibuli ko Singapo (Singapore Bible College). Obu Edeke inyikok ainanakin eong ido kabeit koinak eong akukonokin ailip.

Mam Edeke obu isibiro eong karaida irwanatipet. Kwape eyakia loka akwapin amisikin na eyatakin noi. Iwanyuni ijo, einakini Edeke kitorite nejaas luminan ke ka apak na, mam ainakini eong bon, konye ekekokok lu ipu, ingarenok ka ikalia lu ipudas. Ekekokon lo ajokan einakin oni kere kotoma kopone lo idulokini aiyuunwok kotomake.

Ejakait Yesu Kristo nges ekekokon, ekekokon lo ajokan, loketimon. Emoi nges akemerekekin nuawoliosi. Erai nges ekekokonika kalokonida. Ekekokon lokajokan engirikini adio tionis anu amouna akemerekek na awolio. Ekekokon lokajokan idari ka ayuar ijo ka eong.

Ejeni ekawadikan ebe Ejakaitwok einakini ikepudesia. Ne alimunia ebe emamei ibore yenepuda. "elimunit kodoco ebe emamei ekadakada lo anginibore! Ekekokon lokajokan nges Yawe Yire, akorakinanwok.

Iciesawan, emamei oni amin asianut, aitim, aiyalama, ainapakin, atiting, acoa, aidario, aingarenikinio, amun, ayuara ka ainakinet. Iyemuto lukajokak nges ebe emamei ekadakada! Edumunio kama ejai ekekokon lokajokan. Arai ejai ibore yeni epol adepar kotoma aijarwok, mam ekoto oni atwaniar aitajario. Aijarwok naikar kere ekoto ojai keda ekekokon lokajokan, Ejakait Yesu Kristo lo obu kitajar oni katitai kangin paaran naka aijar wok.

Ainingosit: Inyobo emamei jo kaijar kon, opaperoka?

Ailip:

Opuko akonyeka nejai ajokis naka Ejakait Yesu Kristo lo obu koinak akeijar kanu epuwak tetere ekepuwak itajario. Kotoma okiror loka Ejakait Yesu Kristo. Amen.

Apaaran nakitomenetakanyauni (Day-18)-Ejakait nges engarenikinanka (Isabulin 23:2)

Anginipaaran, ipupi oni iguresia ka aijanganakineta kotoma akwapin. Abeit, eigur arai eijang epedori ajaut okekia luka itaonwok arai oreriawok. Acie akwapin emamei ainapakina kakiro anu eipugae, ayuara naka itunga erai na ijeko kotoma amamus araian. Ekadakada loka edumune loka apiyai ka angaleu ekeun. Ipu itunga lu ejaas keda akurieu namam ejena. Ileleba aiyalongongo otaon ka aomisio kec da ileleba aingiseta. Ido, oraijo, ti jo ilelakinit kotoma ainapakin ka aijen naka ayuara? Ido bo do aiyengun nabeit naidul?

Kotoma Isabulin 23:2, isialamikit ekewadikan ebe ekecokon lokajokan epedorit ainakin nges aipup ngin nainapakin. Kopupok nu ebala nges:

kesiperikini amelo, kengarenikini ariri naka akipi nueililiete.

Ingarenikini oni Ejakait aiboisit naka aisiteteuno, mam nges ebuikini oni. Asekunet na nges aingarenikin oni ejai ne ija oni. Ne ingarenikina nges oni aiboisit na ejok-aiboisit naka aisiteteuno ne ajai ne awonit kotoma aijar wok ne asubitor idio bore bala etwanit, mam italakarit ka emamei alosikinet. Ido ingarenikini Ejakait oni akipi nueililiete, mere ecor lo edakunun. Erai ne aiboisit naililingi, aiboisit na aoomoanar amin naka Edeke, aiyengar ekwam lo ejok kwape ijaunia ajaut naka Edeke ka abeit ke.

Ainingosit: Inyobo isimikit ijo acamakin Ejakait Yesu Kristo loka Nasaret aingarenikin ijo aiboisit naililingi ibwaitai kotomake tetere ijo idumuni ainapakin?

Ailip:

Okwe Edeke, koinakinai eong ainapakin na epuda ka acoa anu aseunun nu ejok kotoma apak na etionor. Aseu eong agongakina toma Ejakait Yesu ka aiting akanin ke ba. Aitup nges toni akipi nueililiete anu aisiteteun ekamoyo kotoma okiror loka Ejakait Yesu Kristo. Amen.



Apaaran nakitomonetakanyaongon (Day-19)-Ejakait nges ekateteunan (Isabulin 23:3)

Kingarenikini oni Ejakait akipi nueililiete ka aiboisit na aiyegun. Eraun ne aiboisit wok naisiteteuno. Iboro ngul bon lu ebilibila arai lu emunara isiteteuno-kwape awanyunet, emotoka lo emojongit lo ejaatar iburekin lumam iswamaete, eicolong lonepuk loecilicila, alaro naka epibiro na emunauna. Itosoma apak anu aitemonokin iboro lu ebilibila arai lu emunauna aputoor bala lu itetiak kotoma aijulujul atutubena, aisutakin eraagi loitetet arai aitojokar ejautenekec.

Ne imengerikina oni Edeke, mam oni ipedori adumun ainapakin naidul kotoma omoyoiwok. Ipuda oni noi aisiteteuno kopone loejok ka aomisio nuedekeone, ejautene lo aomisio ka aswamisio.

Isabulin 23:3 ebala ebe:

Iteteuni ekatau, kengarenikinit korotin luka adolit kanuka ekekiror.

Aitoronikin nabeit, nges ebe anyoun awai kotoma aomisio nuarokok, ejautene loomisio ka aswamisio nges adoketait nasodit naka aisiteteuno. Akirot naka Edeke ka aokot nuka Ejakait Yesu Kristo nuabukoros omusalaba ilotarete oni. Itupucikinitai oni nepepe ka Edeke. Erai lo erot lo adolit (adolit nepepe ka Edeke).

Isabulin 23:3 einakinit oni eipone lojenunet ebe ingai ejaas kapedor aisiteteun ka aingarenikin kotoma korotin luka adolit. Eebo, erai ekecokon lokajokan, Ejakait Yesu Kristo loingarenikini oni kotoma korotin luka adolit. Kwape kicamakina aisiteteuno ka aingarenikin ajaikin, eyagauni ayongio nejai Ejakait Yesu Kristo.

Ainingosit: Anyoin apolou ane ijai jo ajaut aiboisit na ayongio, aisiteteunio ka adolit na einakinit Edeke?

Ailip:

Ejakait Yesu Kristo, ingarenik eong ka Emoyokon Lokalaunan alosit korotin kalu ediding loka adolit. Kitopolorai jo kotoma aijarka kwape ayongia ka aima ijo bon. Amen.



Apaaran na akaisarei (Day-20) –Ejai Ejakait keong (Isabulin 23:4)

Ne asiomia eong Isabulin 23:4:

Eebo, karaida ketor aditot naka etoribe loka atwanare, mam akurianar aronis kere, naarai ijai ijo keong, akonimorok ka ebelakon kes ketalakarito.

Isiitikit eong apaperoka adiope najokan kakere. Kobu otwana kokaru kalo akaulo aiji ejie lokajokan. Mam ekanisa kobu kipiko nges. Karaida eroko alosit korot alo adeka kotoma adoketait nageuna. Aingiseta, aiyalongong ka amamus amuno kesi ainingosia itereikina kaitunga lupu korot alo adeka.

Ibore yen ebus nges ebe anyouni apaperoka kuju na ainingosia ngun ka aisitikin akeijar ebe karaida itor nges aditot naka etoribe loka atwanare, mam nges ekurianar adioronus naarai ejai Ejakait Yesu Kristo kanges kotoma alositeke na etiono. Kotoma apak ke na ationor alosit, apotu aseununetake koraut nu acaete. Eipone ke lo aswam loikamanara akiro acie obu ijulakin anu ajokis ka agogong ke kotoma Kristo kocau noi kanu luce kere aanyun. Arai Edeke ekessinapikinan losodit ido kwana, inyikokinit nges ainumunum aiyengun na ainapakin naeinakini Eketajaran lo ejai kuju.

Amina eong alimunet, "ijai ijo keong" na itebeikinitai okokoron 4 kosabulin23. Ajaut naka Yesu edolit nejai ngin idiopet kaoni mam akurianar adioronis, anu ajenun ngun ija oni kwap naka apedorike, aitetenario ka ayuara. Inyo aitalakario nejai idiopet ajenun ebe Yesu ekekokon lokajokan eupas nepepe kangul lu ipudasi nges! Erai nges asianut naka Edeke na ainakini oni.

Ainingosit: Ijo itorit toma apak na ationis naepol noi, edauna amuno kotoma aijar kon kokodakina akurian? Ipedori ijo aibelokin nejai ediopet ngol lo epedori aitogogong ijo ka alemar akurian kere na ijatatar ijo? Ekekiror nges Yesu, Okoku loka Edeke ka Ekalakunan lo itekoro.

Ailip:

Papa lotoma akuj, eyalama ebe mam eong epuda akurianar adioronis arai atwanare naarai kotoma Ejakait Yesu Kristo. Apedori eong adumun akamun ka agogong na ipikoret ngininingosit keda aiyuun ngin na ibikakinit jo tomaka. Inacan luminanka ka eong da alosit toma aipikor naarai edaunit Yesu aitac etiai. Kobukok asianut kon neijasio tetere iso inyikokinit araut lu Arereng karaida itorit kotoma aditot naka etorube loka atwanare. Anu akonibuses ka kotoma okiror loka Ejakait Yesu Kristo. Amen.



Apaaran na akaisarei idiope (Day-21)-Einakini Ejakait eong (Isabulin 23:5)

Mam eong ajeni arai ajatar eong idio yen asurup konye apaarasia nu. Lu asurup epedori araun idio tunganan yen engar ikristayon. Kotoma onaaba alo ikristayon ereitai anatar akwap, ajeni cut ebe ipedori oni agolokin kojok ebe ipedori oni ajaut kede itunga lumam eraasi ipapero ke aKristo ka lu eminas asesen (aite) ikatupitok ke Kristo mam eyongitai ka aitisilio.

Kotupitete iekia lu engara, atukot na ikristayon na ebwoi ka igangite ikristayon lu ereitai anatar akwap, nepetai ikristayon imillionin 245 ereitai kiding Osuban 2017-Osokosokoma 2018. Aomit eong bon ebe epedori enaaba lo aikeun kotoma oripoti lo ekaru kalo.

Isabulin 23:5 erai aisinyikoikinet neja ikeyuunak kere luka Ejakait Yesu Kristo. Itetemi ekokoro lo ebe:

itemonokini ijo emesa neajai eong kakonyen nuka lukasurupoka, inyonyoik akinyet akouka, ilapanar kadereka.

Ekecekon lokajokan epedorit ainakin kabarara. Kakonyen alukasurupowok, Ejakait Yessu Kristo epedorit ainakin oni, ayuar ka acamunio. Ne etamiata luasurupo ayangaun aitipipilet, aitisilio ka ileic mamawok, elomuni Ejakait ka aitapapan kanuwok kasalakin igogong, kotoma asianut ke ka ayongio.

Kolo, enyonyoikino akou naka itunganan keda akinyet kotoma apak na ainumunum ido korai akinyet na aiyalama ebe ebukokini Ejakait akwesiwok ne ijaar oni nejaas lu asurupowok.

Kotoma apak na areo arai asurokino na ejaas keda apedor na agolokin oni kotoma oleic, Isabulin 23:5 isitikit oni ebe kwape eyuunak luka Kristo, mam oni irumete ileic. Ekot oni amunokin ebe ebuni Edeke aiyun oni kaneja lu asurupowok.

Erai yen anuinyo, mam acie karaida etiono ejautene wok biai, ekot oni ajaut kede etau lo aima, aimal keda aitur. Inyikokini oni asalit toma aiyalama naka Edeke ka amunokina ngesi.

Ne elumoroto aomisio, ejautene ka aswamisio wok nejai abeit naka Edeke, emameun oni akurieu. Abeit, egeunete luipu amisiikin etiai lo eminar Edeke, einakina, eyuara ka ayongit oni kotoma abarara. Ilapanar kaderewok! Aleluya!

Ainingosit: anibo aibosio kotoma ajar kon nu ebeit aijulakinet ajaun tetere ilacakina ijo aijaun ayuara, agogong ka aiyalama naka Ejakait?

Ailip:

(Iwadik ailip kon)



Apaaran na akaisarei iarei (Day-22)- Aijar nepepe ka Edeke (Isabulin 23:6)

Amuno na idiophe yen iyuunit Kristo mam itetemun. Ajai ekawoon amun noi noi akaulo acamun Ejakait kwape ekecokon ke, ekorakinan ka ayuaran kotoma okokoron lu okau. Kotoma otunganane wok lo otoma, ijeni oni ebe Edekewok mam iswamaikini oni adio nu eroko. Erai ngesi lo ejok. Kotoma otunganane wok lo otoma, ijeni oni ebe erai Edeke ekatimon ne ija oni ido ebongobongoi aitodiar akeitim.

Engetakinit ekawoon kosabuli 23 keda:

6 Abeit ajokis ka aitim katupenenete eong apaarasia kere nuka aijar ka. Eboienenei kotogo loka Ejakait ikar kere.

Arerengusio nuiareit adi ainaki oni Edeke? Imar kes kwape aitimesia nuka Edeke. Irwanamwasai esirereng nges...oni? Imar kes kwape asianut naka Edeke. Keda ne itodikina nges oni akemin ka ajokis, ijenui kwana oni ajokis naka Edeke.

Itoduni Edeke akejokis kotoma aidar na einakinit oni. Itodunit Edeke akeitimeta kotoma amin namam nutupitono. Karai da mam oni irai lumunon, esalakinit Edeke erai lomunot. Kotoma aditono. Kotoma aditono nu amuton ka aidules naka ejautene lo aijar wok, iyuuni oni kabeit ebe ajokis ka aitim naka Edeke etupenenete oni toni eiyeng wok lokawasia ka adepar.

Eraun Edeke ere wok loikaru kere. Abeit wok naka ikar kere ejai nepepe ka Kristo, Ekokon-Ekabaka. Ayuara wok kotoma aijulakin naka ajokis ka aitim naka Edeke araun etunganane ecamakinit angin iyuunan yen abeit airiamun nepepe kotoma epeone loejok.

Emoyo lokalaunan kotoma wok emamei aseunet konye aikeun ka ainakin eporoto, aleluya ka amen.

Ainingosit: Eipone bo ani itodikitor Edeke akejokis ka aitim ne ijai jo kotoma apaarasia auni nu atuboros?

Ailip:

Ajokis ka aitim naka Edeke etupenenei eong ka ngul da kere lu amina eong apaarasia kere nuka aijar ka. Abeit eboienenei eong kotoma togo loka Ejakait kotoma okiror loka Ejakait Yesu Kristo. Esunyakit eong aitun ka aimal Edeke kanuka akejokis ka aitim. Amen.

Apaaran na akaisarei iuni (Day-23)- Erai Akwap naka Edeke Loikiara (Isabulin 24:1-2)

Ewadikan: Rachel Chindu (India)

Awate wok elosete ngaren kopone lo etapitor oni aswam bala irai oni ikulepek ido ajatar kaiwadikaet na awate wok. Isabulin 24:1-2 itogogongit aisitikin oni ebe emamei idio bore yen elukunit oni erai yeni wok. Elopel obe erai Edeke lo ajaran. Aso do, lukangai oni ido inyo ijatar oni kwape yeniwok obe?

Isabulin 24:1-2 elimorit ebe:

- 1 Alup eraas nuka EJAKAIT, ka ailelebakec. Akwap kere ka ngul da luiboienete kotoma.
- 2 Naarai abu ngesi kosipok toma angolol, abu kisicat kakalolen.

Omoom bere ijo akwap naedit na ijaria oni. Irai oni idarareok arai iteororok lu koponi kodakakinai kotoma apak naedit. Isabulin 24:1 ebala ebe mam erai alup ka ailelebakec bon, iketunga kere erai lukeng.

Aso, arai iwomit oni ebe irai oni eketikokinak ka luipolokit awatewok, itogogongit Edeke ebe Nges bon erai apedor, Eipugan Loikiara ka Ekabaka loka akwap. Anuangu, awatewok eraas Nuke. Kwape awanyunet, iuriai arai itunga luapolok eminas aomoom ebe itetemonorete apedor kotoma adoketait acie ka aitikitik ikaliakec, noi noi idwe. Keja ngun da, irai oni idarareok luka idwe wok.

Idwe wok kaileleba eraas luka Edeke. Karaida icamunit oni kotoma adoketait ebe eraasi kesi luka Edeke, oni cut ilacakinit araut nuka idwe luwok nejaas akanin nuka Edeke?

Itoni oni alimor Yesu kwape Ejakait ka etajaran loka aijar wok ebe inyarauni Edeke aiya awate wok cut. Erai apak ajenun Edeke noi ka amunokin kotoma aisumunetake. Koraun Yesu Ejakaitwok kotoma kojautene loka aijar wok ido koraun Nges asekunet wok nasodit.

Ainingosit: Eipone bani ibongokina oni Edeke lo ipugai ka Ekatimon?

Ailip:

Ingarak eong okwe Edeke aanyun kwape esesenata akonikonyen. Ejakait Yesu nges apetetait ka, asekuni eong aijar kwape ekedaran lomunot. Kotoma ediosawa, emalai Edeke abeit esirereng eong keda akejokis naipugai ka aitim. Kotoma okiror lokalaunan loka Ejakait Yesu Kristo. Amen.



Apaaran na akaisarei iwongon (Day-24)- Aiticasio kotoma atitingikin Ejakait (Awaragasia 16:3)

Ewadikan: Rachel Chindu (India).

Kwape ilosio kotoma aijar (akuan), iswamaunenei asekuneta nuipu kwape atutubet naka aikuny ka apol. Iciesawan, asekunetawok ka aomisio mam einakinete abongokinet naka ipudesia wok. Arai ijo kwape ka eong, tijo ipudakin ebe ainapeta kon kere itolomutu ajokis ka aiticasio.

Ekaru ediope ka atutubet kokau obu okilenika ka eong asekutu aikunyakin ngaren kotoma aiyuun egwelet etogo komamete isirigin lu adolito. Arai na asekunet na ationo kwape arar ejakaitka (okilenika) bon Amani ido eong aidar ekal.

Ideleleut Ebaibuli ebe eipone ediofet bon anu aiticasio nges atitingikin ka amunokinor iboro kere lu iswamai oni kotoma aomisio, kakirof arai aswamisioit nejai Ejakait lo erai alibunet naka aijen kere ka apedor.

Awaragasia 16:3 esioma:

Kititingik Ejakait aswamisiokon, akoniwomisio da iticasio.

Isumunikit Edeke aitekerian ainapeta wok kotoma aingarakin oni. Ingai papa lo ejok, emunono ka aingarenikit oni! Ejaenena Nges ka oni ido ejai. Ipuda Edeke ikedwe acamun Nges kotoma orotin wok kere luka aijar.

Engarenikit iso Edeke aititingikin asekuneta kosi nu alosit ngaren. Amameiso adio aomisioit na ajaut keda isirigin lugwelis etogo lo. Apotu iso amunokinos Edeke anu ainakin iso. Ainomar kopekwana, emamei iso idio bore konye aitur ka aimal nejai Edeke kosi lomunot anu nuaumokin ka irotin luitegelikina lu etotor Nges iso. Ainakinio naka etogo loitetet idarit iso.

Arimar eyangauni arerengeso nuipu. Ne irimara oni Edeke kotoma amunokina irotin wok kere kotoma aidar ke, amin ka akorakin, ebuni amunonut aisirereng oni kotoma apesikin oni toma Ajokis ke.

Edau nges apesikin oni, karaida adio tionis, mam oni ijangakin cut ido ibuni oni aswam ejok kotoma angin bore yen etemoki nges anuwok. Erai ailipaka ebe oraun Edeke Ekasekanakinan wok.

Ainingosit: Inyoika bo iboro kotoma aijar kon nu ikoto jo aititingikin arai aitemun aititingikin nejai Ejakait?

Ailip:

Papa lotomakuj, acamu eong akoni aipuga ka acoa kotoma aijar ka. Isipedo ka aitogogong eong kapedor naka Emoyo lokalaunan aititingikin ainapeta kere nuka aijar ka ne ijai jo. Ingarak eong amunokin jo anu adio ainakinete ido koinak eong ainapakin kon ne ainakina jo ainapeta ka kere. Epuda eong amoenen aiticasio kon ka aibuses. Kotoma okiror loka Ejakait kosi Yesu Kristo. Amen.



Apaaran na akaisarei ikany (Day-25)- Amun kotoma Kristo itolomuni aswam naka Aiyuun ka Amin (1 Isesalonikan 1:3)

Ewadikan: Rachel Chindu (India)

Ebaga ediope ikar idis kokau, obu Edeke kotiro eong katipe aimor akemin nejaas ikadunyeta lumam iyuunitos kotoma akwapka. Abu eong ageite aoomoom ti egwelet inyamat agwelanaret anu ebaga ka akoranar nepepe ayogan ka naka ebaga. Ejangunda, obu amin naka Edeke isinyikok eong aipo ore kwape nasodit.

Abu apedo aimor akirot naka aminake nepepe ikalia ikany konyamat lupouna kore.

Isitikit oni Edeke kama ejai ekiyafia Paul kotoma 1 Isesalonikan 1:3:

. . . komam kinyeinenei aitunun kakonyen nuka Edeke papawok aswamukus naka aiyuun, ka aitaritoi naka amin, ka atitingikin da naka amun naka Ejakaitwok Yesu Kristo.

Inyarit oni Yesu ka aitojokio araut abalang ka aica naka akwap tetere aswamisiowok nukajokak ecaunete itopoloo nginitunganan papawok lotoma akuj. Imoi oni ainakin Edeke aibuses araimam aswam kere ka agogong na arikakin epeluwok eraun namam erai ka na emoilopet bon.

Aswam wok na amunonut ka aswamisio nuka amin ekot odukokina amun naka Ejakaitwok Yesu Kristo. Isinyikoikitai oni atitingikinit kotoma aijar ka amun na mam enangi na ija keda oni kotoma Ejakait Yesu Kristo. Icie kaoni luipu ija keda ageunet na epol nepepe ka aiyuun ka amun Edeke konye ingetakini icana kotoma amunokin agogongwok anu airikakin ipeleik. Etapit oni atwanianar amun na itei oni kotoma Kristo Yesu ne iterekinar oni aridakinio.

Ipedor oni araut lumunon kotoma aswamwok konye araimam aswamwok erai na isialamikinit kotoma amin naka Edeke, ingetakini oni ijanakini awatewok.

Ainingosit: Eipone bani iwanyuna jo ebe aijanakin kon nejai Edeke erai na itegelikina? Inyobo ejai tomakon iriunit luce nejai Kristo?

Ailip:

Isileleb Edeke itaonwok nepepe ka amin ke. Okwe Edeke, ingarakinai iso nepepe ke Emoyo kon Lokalaunan ainakin awatekosi kaileleba aijanakin kon. Inyikokis luipu aitur ijo ka ainakin ijo aibuses. Kotoma Okiror loka Ejakait Yesu Kristo. Amen.

Apaaran na akaisarei ikanykape (Day-26) - Sirikurianar, kiyuu aiyuun! (Marako 5:36)

Kiyuutor ijo Edeke anu ibore? Acut noi noi anu aumokinet naka angaleu? Eitunit eong apak na ajatar eong keda akong na eleleba ideuna apaarasia adis anu eong anyoun akwap acie. Apipil noi mam eong apedori adio swam na otogo. Abeit, akoto eong atwaniar aijanakin na angaleu kokanisaka. Kobu Edeke kodakak alangiru ne ajai eong ebe, nasodit, eboikin eong otakisi toni okanisa ido naiyareikini, engisi do eong apaperoka ailipakin eong. Kabu arima Edeke.

Ebala Ejakait Yesu kotoma Marako 5:36 nejai ekayaiton ekodet,

“Sirikikurianar, kiyuu aiyuun.”

Eneras Yesu keda papa lo atwanit akoke. Oomoom bere jo, aumokin na papa ne alimokina Yesu nges sirikikurianar, konye kiyuu. Ajai do papa asekun arai aiyuun ngol lo ebwoikinit Yesu, kiyuu ebe epedori Yesu aitangel. Eja ngun da, ebwoikinit Yesu papa loejai toma akuj.

Papa lokwap mam abu iriangirangaikin kotoma amunokin ebe aticepak itangale Yesu, kobu konyarau Yesu togo. Kane, kolimok Yesu ekodet ebe ejotoi apese. Kicorak Yesu apese anyoun, ido kiswamau apese ngun.

Abu Edeke ining eong abeit aiyuun ebe alosi eong okanisa ka nepepe ka akong na ileleba. Kaloma eong okanisa, abu kawany ipaperoka ido abu eweweik idiopet kakesi ebe epuda eong ailip na angaleun keroko iso itegiara aijanakin naka aitangel neja luce. Kobu ngesi kolimok eong ebe epotekesi ailipakin eong akaulo na aingainga.

Ebo, apotu iso etegiasi aingainga ido nepe iwuta aiwo ekosio ediope, abu eong apup aiyeyea kama ejai Ejakait Yesu ido kotema atiar, “etangaleun jo kopana!” Akabongokinet arai, “eebo, Ejakait! Keyuunit ijo ido ejauni angaleu na kopana. Kodaun apipil ka aileleba katipet kotoma apak na aingainga.

Mam bobo ikapapero epudas ailip kanu angaleu bobo. Aleluya! Abu asesen apedor naka Edeke na aitangel kotoma aijaraka.

Ainingosit: Arai inyaki jo akurian kau kotoma aiyuun aitangel naka Edeke, kobwou kosodi aitoronikin. Irengia awai aiyalongongokon kosodi jo aiyuun Ejakait Yesu Kristo ka amunokin ebe karaida mam ijo iwanyuni angaleu katipet, kimunokin do jo Ngol lo itangalei, ayangaun ijo aiyalama akidingot na aiticanio’

Ailip:

Epuda eong awanyun ajaut ka angaleu naka Ejakait Yesu Kristo kotoma akuanka, aijarka emoyo lolo. Eyalama Edeke anu alear adiopipil na apupi eong. Eyalama bobo eong ainyakakinio kaileleba kotoma Okiror loka Ejakait Yesu Kristo. Amen.



Apaaran na akaisarei ikanykarei (Day-27) - Yesu-akipi nukajarak (Yokana 7:38)

Emoyo Lokalaunan loka Edeke nges ingarenikit ka aitetenar oni kotoma alosit wok nakangin paaran nepepe ka Kristo. Kotoma okaru 2019, abu eong epejok akwap na ekidioko ikristayon kotoma atukot kec na edini. Edarit eong apaperoka nakristayot kosawe alo idegei. Kaloma eong kinga atipet, kobu kolimok eong ebe ajai apese na obu iilor ido amamei aijar.

Akabongokinet nasodit arai ebe, “ elipak eong nges?” mam eong kabu apodok ebe ajaas itunga iarei luka aiyuun acie ka ipolisin alukutos eong. Kolim apaperoka ebe ekot kocamutete eong ailip.

Abeit, abu edokok akaninka neajai apese na agelara aiyuun ido ailipakin eyengane loka aijar naka Edeke kotoma aijarake kotoma apedor naka Ekiror loka Ejakait Yesu Kristo. Abu aumok anu atiting ka konye, abu ajenu ebe erai Emoyo Lokalaunan kotomaka nges acamakit eong alimor nepepe ka apedor.

Kotoma Yokana 7:38, ebalala Ejakait Yesu ebe:

“Yenikeyuuni, kwape ineratar nuiwadikatai ebe, eleleete icorin luka akipi nukajarak kotomakang.”

Yesu nges alibunet naka aijar ana. Akipi nukajarak itupusitai nepepe kajaut naka Edeke. Ecor loka aijar elelei anyoun koicolong loka Edeke kotoma oitabo loka Apukokinio.

Kwape ikeyuunak kotoma Kristo, ilosi oni nepepe K’Emoyo Lokalaunan loka Edeke ido ekot oni araut luikapakina eipone lo ekotor Emoyo Lokalaunan aingarenikin ka aitetenar oni.

Apak ngin kosawe alo idegei, akaulo eong aingit Edeke aiyengakin aijar kotoma apese na ido atemar “Amen,” kopukoros akekonyen katipet. Kobu iyenga toma kaidules ido iketunga lukokal ka luce kopotu kolakunos. Aswamisiolit natipet arai ainakin Ejakait Yesu Kristo aiyalama na ikalalai. Kobu Edeke iswamau nukaumokin apaaran ngin ebe itunga lumam eyuunitos luipu kopotu kowanyutu. Akailipa nges ebe epote kesi abeit ajenun Edeke lo ajaran.

Ipapero, arai cut kiyuu oni Ejakait Yesu Kristo, ener Ejakait elope abeit. Kotaonwok eleleete icorin luka akipi nukajarak. Ajaut naka Edeke, etiror luce kotoma aidules, eipone loka ainakin aijar.

Ainingosit: Eipone bani ipedoria ijo aitemokin akonijar acamakin Emoyo Lokalaunan aingarenikin ka aitetenar ijo kotoma amin luce keda aijar kon?

Ailip:

Adio ainakinet najokan na ebuni kokuju erai na papa lokokuju. Okoku loka Edeke ka Emoyo Lokalaunan. Ejauni eong aijar najulijula naerai nakang kotoma Okiror loka Ejakait Yesu Kristo. Amen.

Apaaran na akaisarei kanyauni (Day-28) –Akabakanut naka Edeke nasodit (Matayo 6:33)

Kotoma Osuban, 2019, obu epapero lokajokan ipejok eong kotoma Mexico. Ajai iso apak nakajokan naimanimania ibugai, ainyam inyamat luejokuka ka asioman Akirot-Adiope paaran ageunet kolap alo Opo, alimokinit eong nges ebe epuda eong ainapakin aiyengun naeuriana alosit Acapulco kotoma kolap alo Odunge 2020.

Iteijo, aomit eong ebe akaulo na ilapio iuni nu ainakina aijanakin kotoma akwapin akanykape, arai ti tomapak na aiyengun naedit. Ejok aijanakin kamaka, konye mere ayangaikin arimar Edeke keda araut yen adolit keda Nges kotoma ediopone kere loka aijar.

Ebala Yesu Kotoma Matayo 6:33;

Konye komoata ber yesi akejakanut, ka akedolit da: ido kiyatakinio ngun kere.

Aimo akabakanut naka Edeke ka akedolit apolouke ebe ainakina adiope na ajatatar eong, karaida epolo aswam kotoma aijanakin, erai aiyengun. Ejok aiyengun kamaka naarai iteleli Edeke. Erai apak namam eong autar aitemonokin aiwadikaeta nu aisisianakina arai aisisianakin arai aiswamaunun aputosia nu iteete luce inerasi eijiri. Aneka, aiyengun erai eipone lo adolit arai aitenara nepepe ka Edeke.

Konye alubo iboro lu iyatakinos ne ajai eong ne amoea eong adolit nepepe ka Edeke? Ikkoron lu ejaas kau Matayo 6:33 itijenutos ebe mam oni ekoto aiyalongong. Ijaas oni ka Edeke lo einakini oni naarai epod ngesi oni.

Eutara akwap keda adeka na eyari ageun olap alo Orara 2020 ido amuno eong ebe emameun adeka na eyari ne isiomia ijo aiwadikaeta nu ainakina. Timam eong apedorit alosit Acapulco anu aiyengun ka na auriana! Ejangun da, kobu Edeke kotiro itaon luka itunga ikulepek etogo anyaraun eong aimor kakes apaarasia nu engetakinet esabiti kokaru alo 2019 kotoma Acapulco!

Arai na aitegelikinet naarai kobu iriamun nepepe keda apaaran naka aurioka. Abeit abu do eong apup bala ainakinit eong Edeke ainakinet nabu eong enumunum kaileleba.

Epod teni Edeke kabeit kanu ipudesia wok lu edisiak. Abois na eong aiyengun naedit akaulo na ainakina kotoma aijanakin. Abu Edeke itemonok kanukang na euriana angetakin esabiti eroko esapali kanuka aijanakin.

Ainingosit: Ipapero, inyobo iyalongongo ijo? Koseu lolo aibikakin aiyalongongo kon kere ka ejautene kwap nakakeje ke Ejakait Yesu Kristo lo oponi koyarai. Kosesen Ejakait Yesu Kristo ido kojar aijar na akabakanut na aponi koseikin ijo.

Ailip:

Papa lotomakuj, eyalama ebe esesenete akonikonye ngul lu imina ijo. Imunokin iso ijo araun Ejakait kosi lo ekorakini, Ejakait kosi lo itangalei, Ejakait kosi lo erai emendera. Ingarakinai iso ke Emoyokon Lokalaunan kaijar kapakio nuka akabakanut nginpaaran naka aijar kosi kokiror loka Ejakait Yesu Kristo. Amen.

Apaaran na akaisarei ikanykaangon (Day-29) –Agongakina nejai Yesu (Matayo 6:34)

Kotoma aiwadikaeta nu okau, ewadikat eong nuikamunitos siriyalongongoi ido esinyikoikinit ijo aijal aomisio kakeje nuka Ejakait Yesu Kristo.

Arai eong itunganan yen eyalongongoi kanuka apoloka, ejautene loka isirigin ido eipone loka aijar. Ejangunda, esisianakit eong Ejakait Yesu Kristo ikaru lu ipu kokau ebe epedorit ngesi apod eong.

Aijanakin kosi erai Edeke etirori itaon itunga anu isirigin lu aijanakin. Abu eong adum agogong kanejai ekeyakia akwap nako China. Hudson Taylor lo abu koinak agangat naka isirigin kotoma aijanakin nanyaritai China Inland Mission (CIM) ido kwana ejena kwape atukonokin naka eyakiane loakwapin nu okinga (Overseas Missionary Fellowship-OMF)

Aiboisit naka eyakiane nges aiboisit na etonikit idio eyakia. Mam Hudson Taylor akuenenei ainingosio. Adiope apak ka naceda ajaas keda isirigin lu ekidioko adepar idiopet yen Obulaya, nges keda etimu ke ajaas keda ediope epuko lo emuceri. Inyobo kopotu kesi iswamata?

Abala Yesu kotoma Matayo 6:34;

Aso sirikiyalongongoto nuka moi, naarai iyalongongoi moi kanukeng. Edaunit apaaran aronis ke.

Ebe, mam Hudson Taylor keda etimu ke kopotu komoata iboro, konye asesnete angetakin ainapeta nuka Edeke kotoma China. Kwape akukokinotor kesi ailip, kopup Edeke ka abongokin kes kopone alo apol. Eyakia lo toni akwap naka China kotoma kokaru lu 19. Kolimute akiro nu apedor nu ariko eong adongit kotau ka:

Aswam Edeke na iswamatai kopone loka Edeke, mam etwaniari akorakin naka Edeke.

Ainingosit: Inyobo aiyalongong acie nu erapiaritos aomisio ka etau kon lolo? Ibikak kes akejen kangon alo itingit akaninkon.

Ailip:

Eyalama Papa lokuju ebe isirereng ijo ipudesia kosi kere kotoma opone lo itegelikina tetere ijaikino eong Arereng na ainyakakin aiturio, ayongio ka aibuses nejai jo bon. Kokiror loka Ejakaitwok Yesu Kristo. Amen.

Apaaran na akaisauni (Day-30) –Ingaibo egeikinit ijo? (Ikolosain 1:17)

Etutoorit eong engarenon loka ekanisa emuron Raymond Teo kokaru 1994. Eitut akerit awai kotoma anyararo ke aijanakin atukot naisisia. Esomai eong apakiongun ido abu ening Edeke engisite Nges aijulakin aswam alosit Indonesia arai teni ekoto Ngesi eong Alomar atukot aitutooro. Abangana eong biai aining Edeke!! Kapak anatupakini, abu eong a lot aswam ido lo apolon ka loka New Zealand kobu kolimok eong aijulakin alosite ka.

Ajeni eong abeit eong ajaikin atukot naesisiak. Apakika nakasodit arai na esimonikina. Abu amisiik ebe ayarit eong etengei anu aisia iboro kere lu apedori luikamanara ka Edeke, akabakanut ke ka epeluka kwape ekristayot. Kobu emuron Raymond Teo ining angin esisianke ailip anu ekokoro lokaijar. Erai lo ekokoro loeinakini Edeke nginidiopet kaoni ido ingarenikini abeit na oni kotoma anginibore yen ibikakini oni araun ka aswam kotoma akabakanut naka Edeke.

Abu elip. Edareu. Kododikini eong Edeke Ikolosain 1:17:

Egeikinit ngesi iboro kere, icasito da iboro kere nepepe kotomakeng.

Ekokoro lo ikamanara Ejakait Yesu Kristo ka ayait ke. Egeikinit Ngesi apakio, nges atemar erai ngesi Loajaran. Erai Ngesi Loajaran karaida eroko isuban ejauna. Ido kotoma Kristo, iboro kere kesubunio, nginibore kere imorikikina kotoma Kristo.

Kwape alosio eong akwapin aisisianakin ecokok ka engarenok, alimonokin kokanisan, kodinin alu egelegela ka einer atukonokinesia, esitunenei eong ekokoro lo koponeka.

Nasodit, esitikinit eong ebe Ejakait Yesu ngesi ebeit aitopolor, mere eong.

Naiyareikini, esitikinit eong ebe ekot eong alemunun akiro; aiyalama, agogong, asianut, ainapakin ka amin kanejai Ejakait Yesu, arai eong eyakia loka Kristo.

Naiunikini, esitikinit eong ebe arai eong ayangaran aimorikikina ngin na ipuda Ejakait Yesu anu ikesisiak.

Naiwongonikini, etijenikinitai eong ebe kotoma Ejakait Yesu, aijanakin ka naka aitupucikin erai na eurun itet kotoma adio aswam.

Naikanyikini, naarai Ejakait Yesu erai ekajaran loikiara, ekoto eong aisunyit alimonor adio aibuses, amayo ka ayongio nejai Ngesi.

Ipapero luminan, akoto eong lolo aisinyikoikin yes kwape keswama engarenon ka loka ekanisa.

Ainingosit: Arai mam ijo idumunit ekokoro lokaijar, ilip ido ingit Edeke anu ekokoro ediopet lo eremit ingarenikinite akonijar. Kosodi, kokapakina eipone bani ekepia ijo ekokoro lo koinngaren.

Ailip:

Eyalama Ejakait Yesu ebe kobu ijo kogeik iboro kere ido iboro kere imorikikina kotomakon. Amen.

Apaaran na akaisauni idiopet (Day-31) –Erai lo Edekewok (Isabulin 48:14)

Nasodit, akoto eong aisialamikin ijo kama kotauka. Etimu kosi erai loisirerengitai kanuka aijanakin ijo kopone alo edit.

Alosit namam **Amamus Ileic Karaut Lukon!** mam egeunit ilapio idis kau konye abeit egeunit ikaru idis kau. Abu kajenu ebe epuda eong arimar Edeke ka aiwadik asiometa kotoma Omoyo konye apolokinit eong aswam naka aijanakin.

Alosit ibucite angini lap erai na etiono karaida aminakinit eong. Etosomai eong apak na iyatakina kotoma ailip ka aitemonokin eroko epelu loka aijanakin.

Ne ejangakina ekurut loka korona akwapin, luipu kaoni arai aiboi ore ido alosit da katipet mam ajai. Abu eong ageu aswam aiwadikaeta nu adepar ilapio iarei.

Kapakikana, kobu Edeke koinakinite ikejulak kama Indonesian, Malayalam, Spanish ka Tamil-enerak. Eipone loka aswam naimorikikina mam ti apatana kokaru iarei kau. Kotoma apak naka Edeke, ngin ibore kere elai ido ingarenikini oni.

Isabulin 48:14 erai naibecokina agolokino alosit wok kotoma ajenun ebe oni lu irai ikatupitok ka Kristo, mam ipuda akurian kanuka aiyuun wok namam iriangarianga, amin na ipalit oni, aikor wok na ajalit ka aiyalama wok naikopa ka asianut na einakini Edeke.

Isabulin 48:14 ebala;

Naarai Edeke ngol erai Edekewok ikar lumam enangete, erai ekengarenikinin wok aitodol atwanare.

Edeke Papa, Okoku ka Emoyo Lokalaunan, inyikokini aingarenikit luminan ke bon aki wok kopupete kotoma Omoyo apupun eporoto loka Ekacokon lokajokan. Itetenanari oni Edeke kotoma Omoyo Lokalaunan ngol lo ijanganari oni apupun kojok tetere oni irimari katiting ido katipet.

Ainingosit: Kangetakinet naka aiwadikaeta nuka ailip, ilip ijo kanukosi araun ejanakinak lumunon lu ekapakina arimar ka aitopoloor Ejakait Yesu Kristo?

Ailip:

Akoto eong ailipakin ijo arereng naka Aaron nejaijo. Kisirereng jo Ejakait ka aidar jo, kitacaik jo Ejakait akekonyen ka kiswamaik asianut. Kitonyoik jo Ejakait aica naka akonyeneke-kisinapik. Kotoma Okiror loka Ejakaitwok Yesu Kristo. Amen.